



CH-7144 Vella, 10/06/2016

Novitads dalla suprastanza communal

Legat da Christian Züllig

Christian Züllig, Bülach, ha legau alla vischnaunca las parcellas nr. 8523 ed 8524 a Davos Munts cun ina mesira totala da 9'137 m² ella valeta da circa CHF 5'000. Ei vala la cundiziun, che la relaziun actuala d'affittaziun resti era suenter il transferiment dalla proprietad alla vischnaunca.

Ulivaziun da finanzas 2016

Igl uffeci da vischnauncas ha communicau ch'ei seigi succediu in sbagli tier il preventiv per reparter allas vischnauncas l'ulivaziun da finanzas pil 2016. Per la vischnaunca Lumnezia ei la summa vegnida augmentada per rodund CHF 100'000.

Revisiun dalla planisaziun locala

La suprastanza communal ha decidiu d'instradar la revisiun dalla planisaziun locala. Sco emprem vala ei da fixar la strategia e rededer in catalog cun ils criteris principals. L'incumbensa per metter ensemen ina survesta fundamentala dils vischinadis e per luvrar si ils temas strategics d'impurtonza ei vegnida surdada alla fatschenta Plan-Idee, Laax.

Plans dil vitg

Ils plans fundamentals dils vischinadis stattan a disposiziun sut www.geogr.ch. Ella rubrica «Gemeinden» ein plinavon ils differents plans dil cataster da conducts accessibels.

Molocs a Vignogn

A Vignogn sper il center communal vegnan molocs postai. Igl ei previu da metter mintgamai in container per rumien da casa, in per cuppas da stuors ed in per veider.

Project collectiv per construcziuns da protecziun

Enteifer il project collectiv forestal 2016/2017 vegnan lavurs per construcziuns da protecziun exequidas el decuors da questa stad. Ei setracta da remplazzar ina canal da lenn a Pleif ed in rempar per tener si material sur Surin. Il cantun e la confederaziun subvenziuneschan las investiziuns da CHF 40'000 cun 79%.

Reservat Serenastga

Certas surfatschas d'uaul dalla vischnaunca Lumnezia vegnan strusch cultivadas e nezegiadas pli, essend ch'igl access necessari al territori ei schliats ni buca existents. Ils prezis da condotta ein memia bass per saver curclar ils cuosts da pinar e trer lenna. Ei dat la puseivladad da far in reservat d'uaul natural cun talas surfatschas. Igl uaul vegn buca cultivaus e nezegiaus. En tals areals astga buca vegnir pinau e rimnau lenna e da principi buca vegnir pasculau, la catscha ei lubida ed era encurir bulius e fretgs d'uaul. La vischnaunca s'oblighescha da buca nezegiar igl uaul durant 50 onns. Persuenter survegn ella ina indemnizaziun annuala dalla confederaziun e dil cantun. La suprastanza communal ha approbau in contract da servitud cun il cantun Grischun pertuccont il reservat d'uaul natural el contuorn da Serenastga el vischinadi da Lumbrein.

Cunvegnas cun la Regiun Surselva

La suprastanza communal ha approbau cunvegnas da prestaziun cun la Regiun Surselva davart finanziar ils museums e la cussegliaziun da bulius.

Plaz per setschentar cun helicopter a Dartschietschen/Peiden

La suprastanza communal ha decidiu da pretender dalla 7132 AG d'inoltrar ina damonda da baghegiar per il diever dil plaz per setschentar cun helicopter a Dartschietschen. Sin fundament da quella damonda vegn giudicau sur dils differents aspects pertuccont il dretg da construcziun dil plaz e dallas colligaziuns sco era sur dalla planisaziun dil territori.

Elecziun emprendista per l'administraziun communal

Suenter che la suprastanza communal ha decidiu d'engaschar ell'administraziun communal dus emprendists naven dil 2017, ei vegniu fatg in inserat per encurir in/a emprendist/a sin l'entschatta uost 2017. Igl ei vegniu inoltrau quater annunzias. Vegnida elegida ei Tajana Alig, sesenta a Vattiz.

Tablas da beinvegni

A Valgronda ed al Bogn da Peiden vegnan tschentadas tablas da beinvegni per la Lumnezia.

Bauns da leger

La biblioteca Lumnezia vul far pli enconuscent sia purschida cun postar bauns da leger. Ils bauns cun ina selecziun da cudischs vegnan tschentai en differents loghens, per ex. sper sendas da viandar, plazzas da giugs, etc.

Sustegn finanziel per instituziuns

La suprastanza communal ha decidiu da sustener il project da stad 2016 dalla Pro Juventute Lumnezia cun ina contribuziun finanziaria.